

樸學齋叢書

第二集
(叢刊第一冊)

六

株榮

學刊

刊

蕭長



民國十二年
安吳胡氏刊

樸學齋叢刊序

涇縣胡樸安先生袖其所爲書曰包慎伯先生年譜周秦諸子學略周秦諸子書目讀漢文記歷代文章論略論文雜記筆志紙說律數說共如千種如千卷最爲樸學齋叢刊將付剞劂而屬序於余余謙讓未遑也逾年刊成復申前請乃伏案讀既竟作而言曰富哉先生之爲書也學問之事初患不能入既入矣患不能出不入不深切不出不著明一出一入道通爲一然後教化行神明興焉先生恆言中國學術厯漢宋以迄有清乾嘉之盛補苴張皇能事畢矣生乎其後不能復有發明加以科學波靡人趨物質形上之道求者益希由是前古載籍神州精英方將沈霾糞壤蕩爲灰燼其或眎爲舊珍取充

博物亦無能究其始末攷其真僞者若是則去亡也幾希然則何道而可曰學雖廣要使人易習書雖博要使人易通易習易通非苟爲簡略約抵顯露淺率已也繁而使之簡博而使之約隱而使之顯深而使之淺用能恢廊前緒啓迪來學悠悠思之誠吾輩之所有事矣宇宙一切骸乎能所文字書籍所也求而得之能也不興其能則所亦滅然則先生整理國故之功甚姚遠矣今觀所述諸子學略藝文諸篇如大禹治水脈絡分明如扁鵲療疾洞見癥結如賈胡販海瑰寶悉陳如梓人度材引杖不忒其他游藝識小之錄亦各有指歸先生之學蓋能入而能出者竊怪今之學人或以僻說議世或以武斷自護廢肉而啗馬肝曰上味絕弦而張盆缶曰元音支離顛倒失所

據依未入而求出其弊也固宜先生曩爲中國習慣法論一書頗多
剽獲予既序之近於斯刊之外復爲中國政法史略體大思精他日
成亦一奇書也予綜先生之所詣制行堅卓似顏習齋識度弘達似
包安吳攷證精確似孫籀頤文詞淵懿似汪容甫議論平實似陳東
塾先生雖自謙然非是莫能比並揭於此以告世之讀先生書者中
華民治建極癸亥九月虞山蕭退闇謹序

樸學齋叢刊序

古人不輕言著書更不輕言刻書此固古人矜慎之心實則印刷術未進步有以致之也因印刷術未進步而得書甚難故有與其著書不如鈔書之語又因印刷術未進步而古書未刻者甚多故有與其刻自己之著作不如刻前人之著作之語至於今日得書之易刻書之多千百倍於古人以其多且易也今人不肯讀書也亦千百倍於古人予以爲居今之時無妨輕言著書並輕言刻書以著書刻書縱無益於人或有益於己因好事著書刻書者必先自讀書始也予伏處滬上澹於嗜欲舉凡徵歌選舞博弈等諸游戲之事一無所好小樓一間貯書殆徧治生之暇卽以讀書爲事歲月既積筆札遂多雖

略無倫次而性之所寄輒欲以徵之同好以爲辨疑析難之資抄寫爲勞遂付手民以著書刻書爲讀書之引導此印刷術進步有助於予者多也或有議以有用之精神與金錢爲可惜者則應之曰予之著書也所費者猶他人徵歌選舞博奕等諸遊戲之精神而已予之刻書也所費者亦猶他人徵歌選舞博奕等諸遊戲之金錢而已叢刊第一集排印成因書之以爲序民國十二年八月涇縣胡韞玉樸
安自記

白雲山隱
詩



民國十二年
安吳胡氏刊

樸學齋叢刊目錄

包慎伯先生年譜一卷

周秦諸子學略一卷

周秦諸子書目一卷

筆志一卷

紙說一卷

奇石記一卷

律數說一卷

讀漢文記一卷

歷代文章論略一卷

論文雜記一卷


餘墨一卷

包慎伯先生年譜序

有有用之學有無用之學有用之學兵農禮樂是也無用之學詩文辭賦是也然古來豪傑之士其能兵農禮樂者出其餘以爲詩文辭賦無不才思奮發慷慨激昂若夫沾沾以詩文辭賦自喜者一語夫兵農禮樂之大則張口而無所云嗚呼此有用無用之辨也吾邑包慎伯先生豪傑士也其學問經濟卓然在人耳目卽下至一藝之微亦非世之弄筆墨者所可及韞玉幼讀先生書竊妄自期許舉凡一言一動悉以先生爲程式不屑爲俗儒咕畢之學庚子之役四方騷動韞玉時居鄉里仿戚南塘遺意舉練鄉兵乃事未舉而訾訾者之口卽隨於後癸卯出遊念民食之維艱見荒地之未闢慨然有明農

之意適無湖之萬頃湖壑事伊始遊說舊友墾地四千畝畫界開闢
爲之悉力經營思欲於此先植根基然後大展其志經界甫正洪水
爲災乃復決然舍去鬱鬱無所表見夫先生雖屢招挫折然不用其
身而能用其言每於立譚之頃出百萬生靈於水火之中而登之衽
席韞玉十餘年來小試輒敗一事無成賣文爲生依然俗儒故態然
後歎才力不及之甚也邇來端居多暇將先生一生行事以及學術
文章凡有年可紀者編爲年譜乃復刺取其卓卓者別爲傳以冠其
首嗚呼先生非一縣之人實天下之人非一世之人實萬世之人也
全書具在世之爲有用之學者皆當奉爲圭臬而無俟夫年譜之編
輯特後人之崇拜先哲也驚其磊落奇偉之節每苦無從摹擬及一

讀其編年之書見其學隨年進確有階級之可循則效法之心油然而生韞玉之編先生年譜也非僅寄其高山仰止景行行止之思亦借此以自勵焉爾胡韞玉自識



傳

包世臣字慎伯安徽涇縣人幼讀書至孟子五畝之宅章卽問今日制產何以不如此弱冠游蕪湖受知于中江書院山長程公世淳面試冰賦奇其才薦于徽甯道宋公銘值大旱命作誅旱魃文稿傳至皖江時大興朱文正公以大司馬撫皖見其文異之詢宋公知出先生手召至門下以賈生相期許先生于書無所不讀而尤究心于當世之務名動公卿當時主試江南者皆以不得先生爲恨六赴秋闈乃一遇其座主陳周兩侍郎入都都中無不以得先生爲賀至宮門成邸卽拜手賀曰二公真不愧爲國求賢江南有千里駒朱師傅秣養之十餘年無能市者二公竟一網得珊瑚矣然坐此摧排之者亦